

Skattavaktin*

Fréttabréf skatta- og lögfræðisviðs

6. tölublað

Efnisyfirlit

1. Breyttar reglur varðandi skattmat.
2. Dómar.
3. Frumvörp.
4. Úr vefriti fjármálaráðuneytisins.

1. Breyttar reglur varðandi skattmat.

Nýlega voru settar reglur nr. 496/2007 og 517/2007 um breytingu á reglum nr. 1110/2006, um skattmat vegna tekna manna tekjuárið 2007. Leiddu þessar reglur til breytinga á skattmati ársins 2007 með eftirfarandi hætti:

Kostnaður á móti ökutækjastyrk

Frádráttur á móti ökutækjastyrk tekur tölulegum breytingum frá og með 1. júní 2007 og verður sem hér segir:

Til frádráttar skal leyfa þann hluta af heildarrekstrarkostnaði bifreiðarinnar sem svarar til afnota hennar í þágu launagreiðanda, þó að hámarki **69 kr.** á hvern ekinn km í þágu launagreiðanda. Aldrei leyfist þó hærri fjárhæð til frádráttar en talin er til tekna sem ökutækjastyrkur.

Fái launþegi greitt svonefnt „sérstakt gjald“ (vegna aksturs á vegum fyrir almenna umferð þar sem ekki er bundið slitlag) eða „torfærugjald“ (vegna aksturs utan vega eða á vegaslóðum sem ekki eru færir fólksbílum) á árinu 2007 má hækka hámarksfrádrátt fyrir hvern ekinn km sem hann fær greiddan samkvæmt „sérstöku gjaldi“ í **79,90 kr.** og/eða samkvæmt „torfærugjaldi“ í **100,80 kr.**,

enda sé gerð fullnægjandi grein fyrir því að starfslegar forsendur fyrir greiðslu sérstaks gjalds og torfærugjalds séu uppfylltar.

Frádráttur á móti dagpeningum innanlands

Frádráttur á móti dagpeningum innanlands tekur breytingum frá og með 1. júní 2007 og verður sem hér segir:

- Fyrir gistingu og fæði í einn sólarhring: Kr. 17.700
- Fyrir gistingu eina nótt: Kr. 11.700
- Fyrir fæði hvern heilan dag, minnst 10 tíma ferðalag: Kr. 6.000
- Fyrir fæði í hálfan dag, minnst 6 tíma ferðalag: Kr. 3.000

Breyttar reglur varðandi skattmat vegna tekna manna tekjuárið 2007 voru settar í lok maí og taka gildi frá og með 1. júní 2007.

Bifreiðahlunnindi: full og ótakmörkuð umráð

Gerðar hafa verið breytingar á 3. másl. 6. mgr., kafla 2.3 í reglum um skattmat vegna tekna manna tekjuárið 2007, en kaflinn ber heitið *“Bifreiðahlunnindi – full og ótakmörkuð umráð.”* Orðast hann svo eftir breytingar:

“Sækja skal verð bifreiðar í bifreiðaskrá þess árs þegar bifreiðin var tekin í notkun og margfalda með verðbreytingarstuðli viðkomandi árs eða miða við staðgreiðsluverð nýrrar bifreiðar sömu tegundar á staðgreiðsluárinu 2007 reynist það lægra. “

Þessi regla leiðir t.d. til þess að ef verð bifreiðar er ekki skráð í bifreiðaskrá þá er heimilt að miða við staðgreiðsluverð nýrrar bifreiðar af sömu tegund. Sömuleiðis er hægt að styðjast við þessa reglu ef staðgreiðsluverð sambærilegrar bifreiðar 2007 reynist lægra en framreiknað verð þess árs er bifreiðin var tekin í notkun.

1. Reglur um skattmat

Hér er hægt að nálgast [Reglur um skattmat](#) vegna tekna manna tekjuárið 2007.

2. Upplýsingar um skattmat

Hér er hægt að nálgast [Upplýsingar um skattmat](#) á vef RSK.

2. Dómar.

Þann 7. júní sl. kvað Hæstiréttur upp dóm nr. 419/2006 í máli sem varðaði ábyrgð stjórnarmanna í einkahlutafélögum á skilum virðisaukaskatts og staðgreiðslu opinberra gjalda.

H og Ó voru ákærðir fyrir brot gegn lögum um virðisaukaskatt nr. 50/1988, um staðgreiðslu opinberra gjalda nr. 45/1987 og 1. mgr. 262. gr. almennra hegningarlaga nr. 19/1940, með því að hafa sem stjórnarmenn í einkahlutafélaginu A látið undir höfuð leggjast að standa tollstjóra skil á innheimtum virðisaukaskatti og staðgreiðslu sem haldið var eftir af launum starfsmanna félagsins. Ekki var fallist á að ákæra væri óskýr, málatilbúnaður vanreifaður eða brotið gegn reglum um réttláta málsmeðferð og var frávísunarkröfu H og Ó því hafnað. Í dómi Hæstaréttar kom fram að H og Ó hefðu samkvæmt stöðu sinni sem stjórnarmenn í félaginu A borið að afla sér vitneskju um og fylgjast með að rekstur félagsins væri í góðu horfi, sbr. 44. gr. laga nr. 138/1994 um einkahlutafélög, þar á meðal að félagið stæði í skilum með greiðslu virðisaukaskatts og staðgreiðslu til ríkissjóðs. Brugðust þeir þeim skyldum sínum og voru sakfelldir. Þótti refsing hvors þeirra um sig hæfilega ákveðin fangelsi í þrjá mánuði skilorðsbundið. Þá var hvorum um sig gert að greiða 3.800.000 króna í sekt, enda var ekki talið að fullnægt væri skilyrðum 1. og 3. gr. laga nr. 134/2005 til að lækka sektarrefsingu úr fésektarlágmarki laga um virðisaukaskatt og staðgreiðslu opinberra gjalda.

Þann 14. júní sl. kvað Hæstiréttur upp dóm nr. 311/2006 í máli sem varðaði skil á virðisaukaskatti og staðgreiðslu opinberra gjalda. Ákvörðun refsingar í máli þessu vekur athygli, en sektarfjárhæð var ríflega nífölduð frá því sem héraðsdómur dæmdi.

G var sakfelldur fyrir brot gegn 1. mgr. 40. gr. laga nr. 50/1988 um virðisaukaskatt og 2. mgr. 30. gr. laga nr. 45/1987 um staðgreiðslu opinberra gjalda. Fyrir lá að G greiddi fyrir útgáfu ákæru upp í hluta þeirra gjaldföllnu skattskulda sem ákæra tók til og var við ákvörðun refsingar litið til þess, sbr. 1. og 3. gr. laga nr. 134/2005. Brot G voru talin meiri háttar í skilningi 262. gr. almennra hegningarlaga nr. 19/1940. Refsing G þótti hæfilega ákveðin skilorðsbundið fangelsi í 2 mánuði og var honum einnig gert að greiða sekt að fjárhæð 9.200.000 krónur

Nýverið kvað Hæstiréttur Íslands upp tvo dóma varðandi vanskil á virðisaukaskatti og staðgreiðslu opinberra gjalda. Annað málið vekur athygli vegna ábyrgðar sem lögð er á stjórnarmenn einkahlutafélags og hitt vegna þyngingar á refsingu í Hæstarétti.

3. Frumvörp

Nokkur frumvörp hafa verið lögð fram og miða þau að því að koma til framkvæmda hér á landi tilskipunum Evrópusambandsins á vettvangi fjármálamarkaðarins

1. [Frumvarp til laga um kauphallir](#)
2. [Frumvarp til laga um breytingar á lagaákvæðum fjármálafyrirtækja ofl.](#)
3. [Frumvarp til laga um verðbréfavíðskipti](#)

4. Úr vefriti fjármálaráðuneytisins 31. maí 2007.

Íslendingar erlendis.

Vefrit fjármálaráðuneytisins hefur áður greint frá því að flestir Íslendingar sem flust hafa utan á undanförunum áratugum hafa farið til Danmerkur.

Í tölum dönsku hagstofunnar (Danmarks Statistik) kemur fram að um síðastliðin áramót hafi búið þar í landi rúmlega 7.800 íslenskir ríkisborgarar. Af þeim töldust 3.200 hafa verið starfandi. Á starfsaldri (16-74 ára) voru 5.900 og því er hlutfall starfandi 54%. Ekki er á þessu stigi vitað hversu margir Íslendingar töldust atvinnulausir í Danmörku en sé tekið mið af því að sama hlutfall er 80% á Íslandi er mjög líklegt að fjöldi þeirra sem er við nám sé töluverður.

Tilskipun ESB um endurskoðun ársreikninga

Í maí á síðasta ári samþykkti Evrópusambandið tilskipun 43/2006/EB.

Vegna skuldbindinga Íslands samkvæmt EES-samningnum ber að innleiða tilskipunina í íslenskan rétt. Tilskipunin fjallar um endurskoðun á árs- og samstæðureikningum og eftirlit með endurskoðendum og endurskoðunarfyrirtækjum.

Eitt helsta markmið hennar er að tryggja að fjárfestar og aðrir hagsmunaaðilar geti fullkomlega treyst endurskoðuðum reikningum. Tilskipunin gerir meðal annars ríkar kröfur til óhæðis og faglegrar þekkingar endurskoðenda og ber stjórnvöldum að sjá til þess að til staðar sé öflugt opinbert eftirlit með endurskoðendum og störfum þeirra. Í tilskipuninni eru jafnframt gerðar kröfur um reglulegt gæðaeftirlit með endurskoðendum og að þeir skuli hafa undirgengist viðurkenndar siðareglur.

Þann 1. september sl. skipaði fjármálaráðherra starfshóp sem hefur það hlutverk að gera heildarúttekt á lögum um endurskoðendur og setja fram tillögur að endurbótum á þeim með hliðsjón af ofangreindri tilskipun. Áætlað er að starfshópurinn skili tillögum sínum fyrir áramót en reikna má með að innleiðing tilskipunarinnar kalli á töluverðar breytingar á núgildandi lögum um endurskoðendur.

Skatta- og lögfræðisvið PricewaterhouseCoopers hf.

Við hjá skatta- og lögfræðisviði bjóðum upp á margs konar þjónustu, þar með talið ráðgjöf varðandi:

- Skattlagningu rekstraraðila
- Skattlagningu einstaklinga
- Virðisaukaskatt
- Milliverðlagningu (“Transfer pricing”)
- Félagarétt
- Alþjóðaskattarétt

Til að fá frekari upplýsingar um starfsemina þá er hægt að hafa samband við eftirfarandi starfsmenn:

Ásta Kristjánsdóttir
550-5352
asta.kristjansdottir@is.pwc.com

Elín Árnadóttir
550-5322
elin.arnadottir@is.pwc.com

Elísabet Guðbjörnsdóttir
550-5344
elisabet.gudbjornsdottir@is.pwc.com

Jóhanna Á. Jónsdóttir
550-5356
johanna.a.jonsdottir@is.pwc.com

Valdimar Guðnason
550-5326
valdimar.gudnason@is.pwc.com